

14.07.2025 / 20:00 VIJESTI.BA PODCAST - Intervju za Vijesti.ba

Dr. Gabrić: Veseli me kada ljudima vratim vid, radim 2500 operacija godišnje



Foto: Vijesti.ba

Gost novog izdanja Vijesti.ba Podcasta je prof. dr. sc. Nikica Gabrić, specijalist oftalmolog, osnivač i direktor Specijalne bolnice za oftalmologiju Svjetlost.

Oftalmolog je svjetskog glasa sa preko 100 hiljada operacija očiju, radi već 40 godina. Stručnjak je koji je dodatnom svjetlošću obdario predsjednike država, muzičke i filmske zvijezde, poput Tima Rotha, Armanda Assantea, Radeta Šerbedžiju, Franca Nera, Ivanku Trump, Lepu Brenu...

"Kad doživite to da čovjek progleda, vratite mu neki novi život, ja sam zaljubljen u svoj posao, ja nemam sat, ne gledam na sat, mene veseli to da ljudima vratim vid i vratim neko novo svjetlo", kaže Gabrić.

Kaže da za njega rade ljudi koji su njegovi đaci. U Svjetlosti je 170 zaposlenih za koje mjesečno izdvaja preko milion eura plata, a otkriva nam kako bira kadrove i koja im pitanja postavlja na razgovoru za posao.



"Niko se ne može sada usporediti sa Svjetlosti, prvi ispod nas u regionu je dva puta manji", navodi doktor Gabrić.

Žestoki je kritičar načina na koji država upravlja bolnicama, kaže da smo stvorili društvo u kojem svi imamo neka prava, a niko odgovornost.

"Najveća greška u postsocijalističkim sustavima je ugovor na neodređeno vrijeme. Ja bi radio ugovor na pet godina. Ko je sad zainteresiran otpustiti dobrog radnika, niko! Ali, ne postoji politička volja da se uredi sistem. Kad sam bio nepodoban politički morao sam gledati glupane ispred sebe, onda sam rekao dajte mi moju knjižicu idem sam raditi", kaže Gabrić.

Kaže da je nespojivo da doktori rade istovremeno u javnom i privatnom sektoru.

"Ne možete ujutro igrati za Željezničar, poslijepodne za Sarajevo. Naši ljudi su vrijedini kad odu vani zato što ne mogu djelovati izvan sistema. Vi ovdje ne možete dobiti otkaz, možete doći pijan na posao, ali će oni naći način da vas vrate na posao", kaže Gabrić.

Razgovarali smo o nizu aktuelnih tema, o medicinskim i životnim pitanjima i dilemama, korupciji u zdravstvu, lošem rukovođenju, greškama koje se skupo plaćaju, ali i receptima za uspjeh.

(Vijesti.ba)